

12 OCT 1996

UMNO PEMGANG KUASA POLITIK MELAYU, KATA ABDULLAH

KUALA LUMPUR, 12 Okt (Bernama) -- Naib Presiden Umno yang baru Datuk Abdullah Haji Ahmad Badawi hari ini menyifatkan parti itu sebagai pemegang kuasa politik Melayu dan meminta anggotanya menjadikan Umno berwibawa.

Sambil menganggap Majlis Tertinggi sebagai lembaga pemegang amanah politik Melayu, beliau berkata kuasa politiklah yang membolehkan bangsa Melayu menjadi maju dan martabatnya dapat ditingkatkan.

"Tidak ada Umno, lemahnya Umno, mungkin kita tidak ada lagi kuasa politik," katanya ketika menggulung perbahasan pada Perhimpunan Agung Umno di sini.

Mengimbas ucapan dasar Presiden parti Datuk Seri Dr Mahathir Mohamad pada Khamis lepas yang meminta anggota menyayangi parti, bangsa dan negara, Abdullah berkata harapan itu tidak dapat dicapai melainkan anggota Umno berusaha menjadikan parti mereka benar-benar berkemampuan dan berwibawa.

Katanya parti juga perlu terus mendapat sokongan rakyat untuk memastikan perjuangan Umno berjaya dalam memajukan negara dan meningkatkan martabat bangsa Melayu.

Abdullah berkata tugas anggota ialah untuk terus menyokong segala usaha yang dibuat oleh kepimpinan parti bagi menjayakan perjuangan Melayu. --  
BERNAMA

MAM